

四庫全書

子部

欽定四庫全書

冊府元龜卷七百六

宋王欽若等撰

令長部

強毅

臯陶之述九德其一曰強而義仲尼曰剛毅木訥近仁
又曰士不可以不弘毅若夫宰百里之邑為千室之長
非夫志除豪橫不畏強禦亦何以庇民而興化哉戰國
而下居是職者乃有力祛蠹政深抑權倖敢犯貴勢窮

討姦宄專任威克資以武斷用能保安罷弱澄清邑里
巨猾收斂而知懼下吏震慄而不欺盜徒於鄰邦聲震
于別部苛慝屏去政化以成自非器識邁倫勁直成性
見義而有勇遭事而不惑者亦疇能及於是乎

魏西門豹為鄴令豹往到鄴會長老問之民所疾苦長
老曰苦為河伯娶婦以故貧豹問其故對曰鄴三老廷
掾常歲賦斂百姓收取其錢得數百萬用其二三十萬
為河伯娶婦與祝巫共分其餘錢持歸當其時巫行視

小家女好者云是當為河伯婦即聘取洗沐之為治新繒
綺縠衣閒居齋戒為治齋宮河上張緹絳帷女居其中
為具牛酒飯食行十餘日共粉飾之如嫁女床席令女
居其上浮之河中始浮行數十里乃沒其人家有好女
者恐大巫祝為河伯取之以故多持女遠逃亡以故城
中益空無人又固貧所從來久遠矣民人俗語曰即不
為河伯娶婦水來漂沒溺其人民云豹曰至為河伯娶
婦時願三老巫祝父老送女河上幸來告語之吾亦往

送女皆曰諾至其時豹往會之河上三老官屬豪長者里父老皆會以人民往觀之者二三千人其巫老女子也已年七十從弟子十人所皆衣繒單衣立大巫後豹曰呼河伯婦來視其好醜即將女出帷中來至前豹視之顧謂三老巫祝父老曰是女子不好煩大巫姬為人報河伯得更求好女後日送之即使吏卒共抱大巫姬投之河中有頃曰巫姬何久也弟子趣之復以弟子一人投之河中有頃曰弟子何久也復使一人趣之復

投一弟子河中凡投三弟子豹曰巫嫗弟子是女子不能白事煩三老為入白之復投三老河中豹簪筆罄折嚮河立待良久長老更傍觀者皆驚恐豹顧曰巫嫗三老不來還奈之何欲復使廷掾與豪長者二人入趣之皆叩頭叩頭且破額血流地色如死灰豹曰諾且留待之須臾須臾豹曰廷掾起矣狀河伯留客之久皆罷去歸矣鄴吏民大驚恐從是以後不敢復言為河伯娶婦漢義縱武帝時任長陵及長安令直法行事不避貴戚

以捕按太后外孫修成子中

修成君王太后所生金氏女也中者其子也帝

以為能

胡建昭帝時為渭城令帝幼皇后父上官安與帝姊蓋

主私夫丁外人相善外人驕恣怨故京兆尹樊福使客

射殺之客藏公主廬吏不敢捕建將吏卒圍捕蓋主聞

之與外人上官將軍多從奴客往犇射追吏

奔走赴之而射也

吏散走主使僕射劾渭城令游徼傷主家奴建報亡它

坐

言游徼奉公無他坐也

蓋主怒使人上書告侵辱長公主射甲

舍門

甲舍即甲第
公主之宅

知吏賊傷奴辟報故不窮審

言為游
徼避罪

而妄報文書
故不窮治也

大將軍霍光寢其奏後光病上官氏代聽

事下吏捕建建自殺

何並字子廩哀帝時為長陵令道不拾遺初功成太后

外家王氏貴而侍中王林卿通輕俠傾京師後坐法免

賓客愈盛歸長陵上冢因留飲連日並恐其犯法自造

門上謁謂林卿曰冢間單外君宜以時歸林卿曰諾先

是林卿殺婢婿埋冢舍並具知之以非已時又見其新

免故不發舉欲無令留界中而已即遣吏奉謁侍送林

卿素驕慙於賓客並度其為變儲兵馬以待之林卿既

去北度涇橋令騎奴還至寺門拔刀剝其建鼓諸官曹之所通

呼為寺建鼓一名植鼓建立也謂植木而旁懸鼓焉縣有此鼓者所以召集號令為開閉之時並自從

吏兵追林卿行數十里林卿迫窘迺令奴冠其冠被其

襜褕自代乘車從童騎身變服從間徑馳去會日暮追

及收縛冠奴奴曰我非侍中奴耳並心自知已失林卿

迺曰王君因自稱奴得脫死刑叱吏斲頭持還縣所剝

鼓置都亭下署曰故侍中王林卿坐殺人埋冢舍使奴
剥寺門鼓吏民驚駭林卿因亡命衆庶謹諱以為實死
議也謹諱衆成帝王后以功成太后愛林卿故聞之涕泣為言
哀帝哀帝問狀而善之遷並隴西太守

尹公為茂陵守令原涉為中郎免官欲上冢不欲會賓
客密獨與故人期會涉單車毆上茂陵投暮入其里宅因
自匿不見人遣奴至市買肉奴乘涉氣與屠爭言斫傷
屠者亡是時尹公新視事涉未謁也聞之大怒知涉名

豪欲以示衆厲俗遣兩吏脅守涉室日中奴不出吏欲
便殺涉去涉迫窘不知所為會涉所與期上冢者車數
十乘到皆諸豪也共說尹公尹公不聽諸豪則曰原巨
先奴犯法不得使肉袒自縛箭貫耳詣延門謝辜於君
威亦足矣尹公許之涉如言謝復服遣去

巨先涉字也
令涉如故著

衣服
也

後漢趙憙建武中為懷令大姓李子春先為瑯邪相豪
猾并無為人所患憙下車聞其二孫殺人事未發覺即

窮詰其姦收李子春二孫自殺京師為請者數十終不聽

董宣建武中為雒陽令時湖陽公主蒼頭白日殺人匿主家吏不能得及主出行而以奴驂乘宣於夏門亭候之乃駐車叩馬以刀畫地大言數主之失叱奴下車因格殺之主即還宮訴於光武帝大怒召宣欲箠殺之宣叩頭曰願乞一言而死帝曰欲何言宣曰陛下聖德中興而縱奴殺良人將何以理天下乎臣不須箠請得自

殺即以頭擊楹流血被面帝令小黄門持之使宣叩頭
謝主宣不從強使頓之宣兩手據地終不肯俯主曰文
叔為白衣時歲亡匿死吏不敢至門今為天子威不能
行一令乎帝笑曰天子不與白衣同因勅強項令出

勅令

詣太守賜食宣受詔出飯盡覆拈食机上大官以狀
聞上問宣宣對曰臣食不敢遺餘如奉職不敢遺力

賜

宣錢三十萬宣悉以班諸吏由是搏擊豪強莫不震慄

京師號為卧虎歌之曰枹鼓不鳴董少平

少平宣之字也

馮魴建武中為虞令為政敢殺伐以威信稱遷郟令後

光武西征隗囂潁川賊起攻圍縣舍魴力戰弩矢盡城陷魴遁去帝聞叛馳赴潁川魴詣行在所帝案行關處知力戰乃嘉之曰此健令也

虞延建武末為雒陽令是時陰氏有客馬成者嘗為姦盜延收考之陰氏屢請獲一書輒加笞二百信陽侯陰就乃訴帝譖延多所冤枉帝乃臨御道之館親錄囚徒延陳其獄狀可論者在東無理者在西成乃回欲趨東延前執之曰爾人之巨蠹久依城社不畏熏燒今考實

未竟宜當盡法成大呼稱枉陞戟郎以戟刺延叱使置之帝知延不私謂咸曰汝犯王法身自取之呵使速去後數日伏誅於是外戚斂手莫敢干法

杜安為宛令先是宛有報讎者其令不忍致理將與俱亡縣中豪強有告其處者致捕得安深疾惡之到官治戮肆之於市懼有司繩彈遂自免

祝良為雒陽令案太尉龐參夫人有司以良不先聞奏輒折辱宰相坐繫詔獄良能得百姓心雒陽吏人守闕

請代其罪者日有數千萬人詔乃原刑

吳樹為宛令之官辭梁冀冀賓客布在縣界以情託樹
樹對曰小人姦蠹比屋可誅明將軍以椒房之重處上
將之位宜崇賢善以補朝闕宛為大都士之淵藪自侍
坐以來未聞稱一長者而多託非人誠非敢聞冀嘿然
不悅樹到縣遂誅殺冀客為人害者數十人由是深怨
之

劉陶為除順陽長縣多姦猾陶到官宣募吏民有氣力

勇猛能以死易生者不拘亡命姦臧於是剽輕劒客之

徒過晏等千餘人

過姓也過國之後

皆來應募陶責其先過要

以後效使各結所厚少年得數百人皆嚴兵待命於是覆案姦宄所發若神

黃昌為宛令政尚嚴猛好發姦伏人有盜其車蓋者昌初無所言後乃密遣親客至門下賊曹家掩取得之收其家一時殺戮大姓戰懼皆稱神明

張升守外黃令更有受賕者即論殺之或譏升守領一

時何足趨

趨急也

明威戮乎對曰昔仲尼暫相誅齊之侏

儒手足異門而出故能威震強國反其侵地君子仕不為已職思其憂豈以久而異其度哉

周紆永平中補南行唐長到官曉吏人曰朝廷不以長不肖使牧黎民而性讎猾吏志除豪賊且勿相試遂殺縣中尤無狀者數十人吏人大震遷博平令收考姦賊無出獄者後徵拜雒陽令下車先問大姓主名吏數閭里豪彊以對紆厲聲怒曰本問貴戚若馬竇等輩豈能

知此賣菜傭乎於是部吏望風旨爭以激切為事貴戚
跼躅京師肅清皇后弟黃門郎竇篤從官中歸夜至止
姦亭亭長霍延遮止篤蒼頭與爭延遂拔劍擬篤而肆
詈恣口篤以表聞詔召司隸校尉河南尹詣尚書譴問
遣劍戟士收紆送廷尉詔獄數日貫出後竇氏貴盛篤
兄弟秉權睚眦宿怨無不僵仆紆自謂無全乃柴門自
守以待其禍然篤等以紆公正而怨隙有素遂不敢害
繆彤辟公府舉尤異遷中牟令縣近京師多權豪彤到

誅諸姦吏及託名貴戚賓客者百有餘人威名遂行
王渙永元末為雒陽令以譎數發摘姦伏京師稱歎任
峻渤海人為劇令自王渙卒後連詔三公特選雒陽令
皆不稱職永和中以峻補之峻推用文武吏皆盡其能
糾剔姦盜不得旋踵一歲斷獄不過數十威風猛於渙
而文理不及之

王脩初平中守高密令高密孫氏素豪俠人客數犯法
民有相劫者賊入孫氏吏不能執脩將吏民圍之孫氏

拒守吏民畏憚不敢近脩令吏民敢有不攻者與同罪
孫氏懼乃出賊繇是豪強懾服後守膠東令膠東人公
沙盧宗強自為營塹不肯應發調脩獨將數騎徑入其
門斬盧兄弟公沙氏驚愕莫敢動脩撫慰其餘由是寇
少止

魏司馬芝為管長時天下草創多不奉法郡主簿劉節
舊族豪俠賓客千餘家出為盜賊入亂吏治頃之芝差
節客王同等為兵掾吏掾白節家前後未嘗給繇若至

時藏匿必為留負芝不聽與節書曰君為大宗加股肱
郡而賓客每不與役既衆庶怨望或流聲上聞令條同
等為兵幸時發遣兵已集郡而節藏同等因令督郵以
軍興詭責縣掾吏窮困乞代同行芝乃馳檄濟南具
陳節罪太守郝光素敬信芝即以節代同行青州號芝
以郡主簿為兵

趙儼為朗陵長縣多豪猾無所畏忌儼取其尤甚者收
縛案驗皆得死罪儼既囚之乃表府解放自是威恩並著

楊沛為長社令時曹洪賓客在縣界徵調不肯如法沛
先撾折其脚遂殺之由此太祖以為能累遷九江東平
樂安太守並有治迹坐與督軍爭鬪髡刑五歲輸作未
竟會太祖出征在譙聞鄴下頗不奉科禁乃發教選鄴
令當得嚴能如楊沛比故沛從徒中起為鄴令已拜太
祖見之問曰以何治鄴沛曰竭盡心力奉宣科法太祖
曰善顧坐席曰諸君此可畏也賜生口十人絹百疋既
欲以勵之且以報乾堪也初沛為興平長人多饑窮沛

收乾堪萱豆積千餘斛太祖軍過無糧沛乃進乾堪太祖甚喜故言及之沛辭去未到而軍中豪右曹洪劉勲等畏沛各遣家馳騎告子弟使各自簡勅沛為令數年以公能轉為護羌都尉

沐並為成臯令校事劉肇出過縣遣人呼縣吏來索橐穀是時蝗旱官無有見未辦之間肇人從之並之閣下响呼罵吏並怒因躡履提刀而出多從吏卒欲收肇肇覺知驅走具以狀聞有詔肇為牧司爪牙吏而並欲收

縛無所忌憚自恃清名遂收欲殺之肇髡決減死刑竟復吏由是放散十餘年

滿寵字伯寧守高平令縣人張苞為都督郵貪穢受取干亂吏政寵因其來在傳舍率吏卒出收之詰責所犯即日考竟遂棄官歸後為許令時曹洪宗室親貴有賓客在界數犯法寵收治之洪書報寵寵不聽洪白太祖太祖召許主者寵知將欲原乃速殺之太祖喜曰當事不當爾邪

吳黃蓋從孫策及權諸山越不賓有寇難之縣輒用蓋為守長石城縣吏特難簡御蓋乃置兩掾分主諸曹教曰令長不得徒以武功為官不以文吏為稱今賊寇未平有軍旅之務一以文書委付兩掾當簡攝諸曹糾摘謬誤兩掾所置事入諾出若有姦欺終不加以鞭杖宜各盡心無為衆先初皆怖威夙夜恭職久之吏以蓋不視文書漸容人事蓋亦嫌外懈怠時有所省各得兩掾不奉法數事乃悉請諸掾吏賜酒食因出事詰問兩掾

辭屈皆叩頭謝罪盖曰前已相勅終不以鞭杖相加非相欺也遂殺之縣中震慄後轉春穀長尋陽令凡守九縣所在平定遷丹陽都尉抑强扶弱山越懷附

賀齊字公苗會稽山陰人少為郡吏守剡長縣吏斯從輕俠為姦齊欲治之主簿諫曰從縣大族山越所附今日治之明日寇至齊聞大怒便立斬從從族黨遂相糾合衆千餘人舉兵攻縣齊率吏民開城門突擊大破之威震山越

凌操為永平長平治山越姦猾斂手

晉張輔為藍田令不為豪強所屈時强弩將軍龐宗西州大姓護軍趙浚宗婦族也故僮僕放縱為百姓所患輔繩之殺其二奴又奪宗田二百餘頃以給貧戶一縣稱之轉山陽令太尉陳準家僮亦暴橫輔復擊殺之

山遐字彥林為餘姚令時江左初基法禁寬弛豪族多挾藏戶口以為私附遐繩以峻法到縣八旬出口萬餘縣人虞喜以藏戶當棄市遐欲繩喜諸豪強莫不切齒

於遐言於執事以喜有高節不宜屈辱又以遐輒造縣舍遂陷其罪遐與會稽內史何充牋乞留百日窮翦逋逃退而就罪無恨也充申理不能得竟坐免官

前秦王猛為始平令縣多枋頭

枋頭地名

西歸之人豪右縱

橫劫盜充斥猛下車明法峻刑澄察善惡禁勒強豪鞭殺一吏百姓上書訟之有司劾奏檻車徵下廷尉詔獄苻堅親問之曰為政之體德化為先蒞任未幾而殺戮無數何其酷也猛曰臣聞宰寧國以禮治亂邦以法陞

下不以臣不才任臣以劇邑謹為明君剪除凶猾始殺一姦餘尚萬數若以臣不能窮殘盡暴肅清軌法者敢不甘心鼎鑊以謝孤負酷政之刑臣實未敢受之堅謂羣臣曰王景略固是夷吾子產之儔也於是赦之

宋虞玩之為烏程令路太后外親朱仁彌犯法玩之依法錄治太后怨訴孝武坐免官

劉亮為武康令時境內多盜鑄錢亮掩討無不擒者所殺以千數

南齊丘仲孚為于湖令有能名太守呂文顯當時倖臣
凌詆屬縣仲孚獨不為之屈

孔琇之為吳興令有小兒年十歲偷刈隣家稻一束琇
之付獄治罪或諫之琇之曰十歲便能為盜長大何所
不為縣中皆震肅

梁張稷為剡縣令時賊唐瑤作亂稷率勵縣人保全縣
境

江草歷秣陵建康令為治明肅豪強憚之

王檣為秣陵令清直請謁不行羽林隊主潘敞有寵二
宮勢傾人主婦弟犯法敞為之請檣檣投書於地更鞭
四十敞怒諧之明日而見代

沈瑀為餘姚令縣大姓虞氏千餘家請謁如市前後令
長莫能絕自瑀到非訟所通其有去者悉立之階下以
法繩之縣南又有豪族數百家子弟縱橫逋相庇蔭厚
自封植百姓甚患之瑀召其老者為石頭倉監少者補
縣僮皆號泣道路自是權右屏跡瑀初至富吏皆鮮衣

美服以自彰別瑀怒曰汝等下縣吏何自擬貴人邪悉使着芒鞋麤布侍立終日足有蹉跌輒加榜捶瑀微時嘗自至此鬻瓦器為富人所辱故因以報焉由是士庶駭然而瑀廉潔自守故得遂行

陳蕭引為建康令時殿內隊主吳璉反官官李善慶蔡脫兒等多所請囑引一皆不許引始族子密時為黃門郎諫引曰李蔡之勢在位皆畏憚之亦宜少為身計引曰吾之立身自有本末亦安能為李蔡改行就令不平

不過解職耳吳璉竟作飛書李蔡證之坐免官卒於家
褚玠為山陰令縣民張次的王休達等與諸猾吏賄賂
通姦全丁大戶類多隱沒玠乃鎖次的等具以狀啓臺
宣帝手勅慰勞并遣使助玠搜括所出軍民八百餘戶
時舍人曹義達為宣帝所寵縣民陳信家富於財諂事
義達信父顯文恃勢橫暴玠乃遣使執顯文鞭之一百
於是吏民股慄莫敢犯者

後魏元志為雒陽令不避強禦與御史中尉李彪爭路

俱入見面陳得失彪言御史中尉辟承華車蓋駐論道
劍鼓安有雒陽令與臣抗衡志言神鄉縣主普天之下
誰不編戶豈有俯同衆官趨避中尉孝文曰雒陽我之
豐沛自應分路揚鑣自今以後可分路而行及出與彪
折尺量道各取其半帝謂邢巒曰此兒竟可所謂王孫
公子不鏤自雕巒曰露竹霜條故多勁節非鸞則鳳其
在本枝也

宗翻字飛鳥為河陰令順陽公主家奴為劫攝而不送

龔將兵圍主宅執聳馮穆步驅向縣時正炎暑立之日
中流汗霑地縣舊有大枷時人號曰彌尾青及龔為縣
主吏請焚之龔曰且置南牆下以待豪家未幾有內監
楊小駒詣縣請事辭色不善命取尾青以鎮之既免入
訴於宣武大怒勅河南尹推治其罪龔具自陳狀詔曰
卿故違朝法豈不欲作威以買名龔對云造者非臣買
名者亦宜非臣所以留者非敢施於百姓欲待兇暴之
徒如小駒者耳於是威震京師

高綽字僧裕為洛陽令為政強直不避豪右京邑憚之
楊機字顯畧行河陰縣事當官正色不避權勢後為雒
陽令京輦伏其威風希有干犯

鄧淵字彥海為蒲吾令誅翦姦猾盜賊肅清

陽固字敬安為雒陽令在縣甚有威風

高崇字積善為雒陽令為政清斷吏民畏其威風每有
發摘不避強禦縣內肅然

北齊路去病為定州饒陽令去病明閑時務性頗嚴毅

人不敢欺然至庶平為吏民歎服擢為成安令輦轂之下舊號難治重以政亂時難綱維不立功臣內戚請屬百端去病消息事宜以理抗荅勢要之徒雖廝養小人莫不憚其風格亦至嫌恨自遷鄴以還鄴與臨漳成安三縣令治術去病獨為稱首

後周樂運建德中為萬年縣丞抑挫豪右號稱強直高祖嘉之特許通籍事有不便於時者令巨細奏聞

隋魏德深大業中為館陶長闔境老幼皆如見其父母

有猾人員外郎趙君實與郡丞元寶藏深相交結前後令長未有不受其指麾者自德深至縣君實屏處於室未嘗輒敢出門逃竄之徒歸來如市

唐劉仁軌為陳倉尉部人有折衝都尉魯寧者恃有高班豪縱無禮歷政莫能禁止仁軌特加誠喻期不可再犯寧又橫暴尤甚竟杖殺之州司以聞太宗怒曰是何縣尉輒殺吾折衝遽追入與語奇其剛正擢授櫟陽丞李朝隱景雲初為長安令朝隱政刑畢舉權豪懾憚有

內寺伯非禮干忤朝隱叱繫於獄睿宗嘉之加朝隱大
中大夫

馬燧寶應中為趙城尉是時回紇大軍還國恃復東都
之功倔强恣睢所過或虜掠廩餼不如意輒賊殺之澤
潞節度李抱玉難其供辦賓介皆憚不敢行燧自贊請
主郵驛比迴紇至則先厚賂其渠帥與明要約迴紇乃
授燧旗幟為識有犯令者令燧戮之燧又取死囚給左
右廝役小違令殺之迴紇相顧色動涉其境無敢暴掠

抱玉奇之

竇叅代宗朝為奉先尉縣人曹芬隸北軍素兇暴與弟
毆其女弟芬父救之不得遂投井死叅捕理芬兄弟當
死官皆請俟免喪叅曰子因父生父由子死若以喪延
罪是殺父不坐也皆正其罪而杖殺之一縣畏伏

晉顏衍兖州曲阜人仕梁為青州北海主簿自卑官不
畏強禦縣民有豪暴者必嚴刑制之由是知名

冊府元龜卷七百六

欽定四庫全書

子部

冊府元龜卷七百七十

至

詳校官中書臣吳璣

侍讀臣孫球覆勘

總校官庶吉士臣何思鈞

校對官典簿臣劉景岳

謄錄監生臣陳賓

欽定四庫全書

冊府元龜卷七百七

宋 王欽若等 撰

令長部

酷暴

黜責

貪黷

酷暴

逸德比於烈火苛政甚於猛虎雖百里之非廣乃編氓
之攸賴則有性既嚴酷貌復兇很惟申韓之是法於理
刑而失中報虐以威斂怨於下峻罰是長殘殺無罪或

馮勢而成濫亦擊強而過正乃至榜楚不絕網罟交設
重足斯畏謠言載興寧失不經斯可鑒矣

漢義縱補上黨郡中令治敢往少溫藉

敢行暴害之政
少溫藉言無所

含容也溫於同
切藉才夜切

嚴延年為平陵令坐殺不辜去官

尹賞為頻陽令坐殘賊免

後漢陽球為高唐令性嚴厲好申韓之學以嚴苛過理

郡守收舉

收擊舉
劾之

會赦見原

周紆為雒陽令章帝知紆奉法疾姦不事貴戚然苛慘
失中

也慘虐

數為有司所奏遂免官

徐宣為下邳令暴虐尤甚先是求故汝南太守下邳李
嵩女不能得及到縣遂將吏卒至嵩家載其女歸戲射
殺之埋著寺內

魏滿寵漢末為許令時曹洪宗室親貴有賓客在界數
犯法寵收治之洪書報寵寵不聽洪白太祖召許主者
寵知將欲原乃速殺之太祖喜曰當事不當爾耶故太

尉楊彪收付縣獄尚書荀彧少府孔融等並屬寵但當受辭勿加考掠寵一無所報考訊如法數日求見太祖言之曰楊彪考訊無他辭諸當殺者宜先彰其罪此人
有名海內若罪不明必大失民望竊為明公惜之太祖
即日赦出彪初彧融聞考掠彪皆怒及因此得出復善
寵裴松之以為楊公積德之門身為名士縱有愆負猶宜宥免淫刑所濫而可加其楚掠乎若理應考訊荀
孔二賢豈其妄有相請屬哉寵以此為能酷吏之用心耳雖有後善何解前虐

齊江介為吳令其父謚為長沙內史謚政治苛刻介治

亦深切民間榜死人髑髏為謚首介棄官而去

梁沈瑀為餘姚令富吏鮮衣美服以自彰別瑀怒曰汝等下縣吏何自擬貴人邪悉使著芒屨麤布侍立終日足有蹉跌輒加榜捶

陳庚時為臨安令坐杖殺縣民免

唐權懷恩高宗咸亨中為萬年令不避強禦時有雒陽令楊德幹亦以威嚴為人吏所畏時人語曰寧喫三斗塵不逢權懷恩寧喫三斗炭不逢楊德幹

楊德幹為雒陽令杖殺人吏以立威名雒州長史賈敦
實曰政在養人義須存撫傷生過多雖能亦不足貴也
常抑止德幹德亦為稍減

楊迴為盈川令政殘酷人吏動不如意輒榜殺之

王鈞玄宗開元中為雒陽尉與河南丞嚴安之皆性毒
虐笞罰人畏其不死決杖訖不放下須臾其腫憤徐乃重
杖之懊血流地苦楚欲死鈞與安之始眉目喜暢故人
吏懾懼

毛若虛天寶中為蜀川尉若虛眉毛覆於眼性殘忍使
司以推勾見任

侯遵德宗貞元中為富平令縣人李載配納元陵園冀
兩車愆期或譖毀載於遵者因寄怒以痛繩之載所負
之值不過數千而罰之三百貫文枷禁拽辱焉載妹壻
昭得皇后弟王杲奏之帝命御史臺鞠之遵具款伏宰
臣董晉竇叅進曰李載不納差科未為巨蠹侯遵峻其
懲罰頗越常倫況是國親去就有禮毀損過甚理當罪

卷之七十七
責望貶澧州司戶叅軍帝不欲以戚屬之故而罪吏止
停其官

黜責

令長字民之重任也黜陟馭下之大典也列國以大夫
守邑漢氏以郎官出宰自茲已降名數寢優宜乎撫惠
黎蒸宣暢德澤若乃性異明達行非貞素依違不斷苛
刻無恩訟起獄豐土荒民散或沉湎棄職聚斂是圖儲
峙闕供裁處非允瘡痍既積怨讟並興廢百里之威煩

三尺之法為人臣者可不慎歟其有因虐吏之奏劾繇
要臣之誣毀以陷於非罪者亦類次于篇云

阿大夫

史不書
姓名

齊威王即位召阿大夫語曰自子之守

阿譽日聞然吾使人視阿田野不闢民人貧若是子以
幣厚吾左右以求譽也乃烹阿大夫

漢任安為三百石長坐上行出游共帳不辦斥免

尹賞為頻陽令坐殘賊免

朱雲為杜令坐故縱亡命會赦

後漢鄭興為蓮勺令

蓮音輦勺音酌故城在今下邳縣

是時喪亂之餘

郡縣殘荒興方欲築城郭修禮教以化之會以事免

尹敏為長陵令明帝永平五年詔書捕男子周慮慮素

有名稱而善於敏敏坐繫免官及出歎曰瘖聾之徒真

世之有道者也何謂察察而遇斯患乎

周紆為雒陽令苛慘失中數為有司所奏遂免官

陽球為高唐令以嚴苛過理郡守收舉

收繫舉劾之

會赦見

原

曹褒為園令以禮理人以德化俗時它郡盜徒五人來入園界吏捕得之陳留太守馬嚴聞而疾惡風縣殺之褒勅吏曰夫絕人命者天亦絕之臯陶不為盜制死刑管仲遇盜而升諸公今承旨而殺之是逆天心順府意也其罰重矣如得全此人命而身坐之吾所願也遂不為殺嚴奏褒與弱免官歸郡

蜀蔣琬字公琰為廣都長先主嘗因遊觀奄至廣都琬衆事不理時又耽酒先主大怒將加罪戮軍師將軍諸

葛亮請曰蔣琬社稷器非百里之才其為政以安民為本不以修飾為先願主公重加察之先主雅重亮乃不加罪倉卒免官而已

宋沈文秀字仲達為建康令坐為尋陽王鞭殺私奴免官加杖百尋復官

南齊沈攢之為丹徒令性疎直在縣自以清廉不事左右浸潤日至遂鑕繫尚方歎曰一見天子足矣武帝召問曰復欲何陳答曰臣坐清復以獲罪帝曰清復何以

獲罪曰無以承奉要人帝曰要人為誰嶺之以手板四面指曰此赤衣諸賢皆是若臣得更鳴必令清譽日至嶺之雖危言帝亦不責

梁庾仲容歷永康錢唐武康令治縣並無績多被劾

唐裴行儉為長安令高宗顯慶中坐褚遂良事左遷西州都督府長史

王同慶為汾州平遙縣令玄宗開元十一年坐貶處州贛縣尉勅曰朕問俗觀人務存節儉先有處分不許煩

勞王同慶違法擾人借飲無紀望鄉科被率戶出鞋屏
風花盤計盈數百徵求既廣般運又勞以此字人豈我
良宰宜書刑典以誠具寮

李泳為鄧州南陽縣令開元二十四年坐擅興賦役遂
貶康州都城縣尉

薛近為長安縣尉徐綱為萬年尉代宗大曆五年四月
貶近連州連山縣尉綱邵州武岡縣尉並員外置是月
久雨京城饑代宗令出米五萬石減價分糶貧人近等

踰法徇私是以懲也

劉澡為渭南令大歷十二年京畿水旱京兆尹黎幹奏
損田戶部侍郎判度支韓滉執奏幹不實乃命巡覆時
澡曲附度支具干善名以縣界田並無損白於府及戶
部分巡御史趙計不欲忤度支奏報協澡代宗覽奏以
為水旱咸均不宜渭南獨免特命侍御史朱敖再覆敖
覆命渭南損田三千餘頃帝歎息久之大怒澡因謂敖
曰縣令職在字人不損猶宜稱損損而不問豈有恤隱

之意耶卿之此行可謂稱職下有司訊覆澡及趙計並
伏罪乃貶澡為萬州南浦縣員外尉計為澧州員外司
戶叅軍

荀曾為三原縣令德宗貞元二年四月以無政理改授
司議郎

李佇為虔化縣令憲宗元和九年七月勅佇虐下以慘
訊罪違律至使饋餉皆絕瘦死非辜因其壅隔更令殘
毀戕人及此良用憮然俾投禦魑之鄉以戒字氓之長

可守雷州海康縣尉

劉行餘為馮翊縣尉敬宗寶曆元年十月坐擅決軍人貶道州延昌尉

姚中立為萬年縣令孟瑄為長安縣令文宗太和九年

十一月兩縣捕賊官領其徒受羅立言指使

王欽若等曰立言為

同李訓內萬年縣捕賊官鄭洪懼而詐死令其家人喪

鄭注事

服而哭中立陰識之慮其詐聞不能免所累以其狀告之洪藏入左神策軍洪銜中立之告返言追集所繇皆

縣令指揮故貶中立為朗州長史琯為硤州長史尋再貶中立為韶州司戶叅軍琯為梧州司戶叅軍

朱儁為京兆府美原縣主簿文宗開成三年十二月貶為衡州衡山縣尉初奉先馮翊等縣百姓為牛羊使占其田產儁奉使推鞠盡以百姓田歸牛羊司給事姚合列疏其事遂貶之

梁高綰為封丘令太祖開平元年六月以封丘境內虫蝗為災最甚太祖令近界撲滅下明勅以懸賞罰之戒

以綰不恭罰金仍免官

田光裔為穀熟縣令開平四年四月宋州衡王友諒進瑞麥一莖三穗太祖覽奏不懌曰古來上瑞惟在豐年合穎兩岐皆是虛事乃停光裔官仍追毀歷任官牒以瑞麥故也

後唐劉知章為醴泉縣令長興元年七月明宗命迴鶻侯三走馬入迴鶻部給程有日沿路乘驛而行醴泉既非衝要素無驛馬長吏供億無准洎侯三至縣索驛馬

館穀所司未辦適遇知章不在縣或謂侯三云知章出從禽之矣鎮將以馬給之俄而知章至哀訴引過侯三不之顧因奏其狀明宗大怒促命械送至京事幾不測安重誨從容奏覆方得減死配流沁州

張紹業為湘州臨漳令長興元年縣人劉暉訟紹業贓賄不公及借便官物勅旨張紹業勒停見任

薛文玉為武功縣令長興元年九月西京奏武功縣百姓三千餘人持白棒入縣亂擊人吏分劫縣庫稅錢公

解什物尋差兵士捉到結集首領武功鎮將跌跌疏等
三十二人各招本罪稱縣令以大竿尺簡田所以衆心
難抑其跌跌疏准法科斷文王罰七十直主簿李彥柔
罰五十直並勒停

鄭延朗為衛縣令長興元年九月魏博奏延郎自於獄
中推劾盜賊妄引平人孫厚延郎自行拷決孫厚致死
勅旨付大理詳覆以聞

盧嵩為獲嘉令長興元年五月坐戶民關延韜不伏責

問喧悖令從人曳撲良久致死大理寺斷配流大德勅
旨盧嵩容易宰邑造次怒人不如法以行刑遂尋時而
致死原情則本非故殺據律則當處極刑小不忍而難
追內自訟而何及法不可墜義亦須明但究彼根繇似
緣公事罪雖甚重理稍可疑峻行則慮致民驕輕恕則
恐滋吏酷永從遠竄特貸餘生聊以慰往者之冤無可戒
為官之屬嵩宜配蔚州長流百姓縱逢恩赦不在放歸
之限其出身歷任告勅付所司焚毀餘依省寺詳斷

王韜玉前為湖陽令愍帝時於端門接宰臣陳考績事
不實配流坊州

晉張嗣宗為襄邑縣令少帝開元二年開元府奏嗣宗
先被百姓趙覺直論訟不公法寺定罪合徒一年半以
官收贖贖銅三十斤府司尋科放訖據新除襄邑令王
允昇狀申稱張嗣宗不肯交割縣務稱未考滿者勅旨
張嗣宗已招過犯斷處徒刑雖定徵銅更難居任既聞
除替便合稟承乃敢拒違益彰狡惡須加竄謫俾省憊

尤宜配流商州

周陳權前為清水令太祖廣順三年四月勅追奪前任
官牒毀棄仍長流房州權居許州舞陽縣與隣子曙爭
地詐埋石為記及措改契內文字既伏其罪故有是責
駱延規為開封縣令世宗顯德六年九月除名流沙門
昂先是延規有過停任有司召延規宣勅延規拒命為
憲司所按故有是命

貪黷

夫製錦之重象雷之威有社稷焉有民人焉可以專刑
辟可以移風俗一同之地禍福所繇百乘之賦豐約斯
繫自非守不欺之誠存慎獨之心則何以奉政經去民
瘼其或罔思潔已姑務藩身忘清白之訓恣貪墨之欲
或凌厲其氣以威下民或便辟其容以附權右肆豺狼
之心盈谿壑之志或人不堪命盜以之興或法不可逃
身繇之殞雖惡有巨細事有隱顯然而流毒於下斂怨
于上則一揆焉爾詩云貪人敗類其惡之深矣

漢楊湛為高陵令謝游為櫟陽令皆貪猾不遜左馮翊
薛宣手自牒書條其姦賊湛自知罪賊皆應記即時解
印綬付吏為記謝宣而游自以大儒有名輕宣宣獨移
書顯責之曰告櫟陽令吏民言令治行煩苛適罰作使
千人以上賊取錢財數十萬給為非法賣買聽任富吏
賈數不可知

賈讀
曰價

證驗明白游得檄亦解印綬去

後漢居風令

史不書
姓名

貪暴無度縣人朱達等及蠻夷相

聚攻殺之

張朔為野王令貪殘無道聞司隸校尉李膺威嚴懼罪
逃還京師

晉袁毅陳郡人為鬲令貪濁而賂遺公卿以求虛譽後
事露檻車送廷尉

李彰為姚萇槐里令以黷貨誅於是郡國肅然矣

梁丘仲孚仕齊為山陰令居職甚有聲稱齊末頗有賊
賂為有司所舉將見收仲孚竊逃逕還京師詣闕會赦
得不治

唐王鈞為雒陽縣主簿玄宗開元十年三月坐賊杖殺裴景仙為冀州武強令開元十年八月坐賊逃匿聽集衆殺之勅曰有善必賞所以勸能有罪必誅所以懲惡代天理物勤憂萬姓求瘼恤人寄之牧宰共理天下寔在於茲裴景仙幸以緒餘素無名檢恣行貪冒不憚典刑聚斂之賊至五十疋肆其威虐剥我黎元自作何逃仍更亡命此而將捨罪孰可誅雖法有常科合寘投竄而情在難恕用申懲肅宜令集衆決殺仍宣告遐邇

宋廷暉為宣州溧陽令周仁公為涇州良原令裴裔為
寧州彭原令開元二十五年正月皆犯賊坐死刑玄宗
以陽和在候特恕之悉杖六十配流于龔州勅曰朕思
致時和每矜刑典而貪饕之吏抵犯自多猶龔耻格豈
在哀矜宣州溧陽令宋廷暉等各效官榮非無祿利不
能砥礪乃黷貨賊使者繩違刑曹定罪並當極法合正
嚴科然而發生在時布澤茲始永言惻隱能無惠恤乃
期改過且用輕刑宜並配流即差綱領送雖止殺之義

頗乖於國體而好生之德冀洽於人心教而不誅庶乎
不及何必峻罰然後為善凡今在位宜副此懷

柳昇為長安縣令天寶三年坐贓於朝堂杖殺之

竇崧為萬年縣令代宗永泰元年坐贓流虜州百姓

高曖為鄭州陽武縣令憲宗元和九年七月坐侵蠹百
姓貶恩州陽江縣尉

殷復易為長水縣令元和九年九月坐求利擾人貶永
州司戶叅軍

韓晤為萬年捕賊尉元和十二年以姦賊發京兆尹竇
易直使法曹掾韋正收鞠之得賊三十萬帝意其未盡
令復鞠之果得賊三百萬晤除名配流昭州

王仲堪為澠州上蔡縣令穆宗長慶元年八月坐賊錢
八百二十貫勅上蔡久經寇虐方藉緝綏忍加厚飲害
此疲俗委本道觀察使決重杖處死

龐驥為遂寧縣令長慶四年東川觀察使奏驥犯賊事
下大理寺以法論中書舍人楊嗣復等叅酌曰龐驥賊

貨之數為錢四百餘千其間大半是枉法據贓定罪合處
極刑雖經恩赦不在原先伏以近日賊吏皆蒙小有矜寬
類例之間慮須貸死勅長吏犯贓其數不少縱寬刑典
難免鞭笞但以近遇鴻恩人思減等雖節文不在免限
於情理亦要哀矜龐驥宜除名溪州其贓付所司准法
孟孚為蘇州嘉興縣令敬宗寶曆元年六月坐贓杖四
十除名流康州

劉伋為藍田令寶曆二年三月御史臺推勘在任日將

諸色錢隱沒破用凡九十餘萬制曰劉伉所犯賊私其數至廣恣為貪猾固抵刑章若據本條合當極法以其大父於國有勞特為矜量俾從寬宥宜除名流雷州伉故宰相晏之孫也

李林宗為河南縣令為縣未數月賤買市人縑帛文宗太和七年三月坐贓貶

梁陳知古為華陰縣令太祖開平元年十一月同州劉知俊奏知古因抽選丁藏匿富戶以受其賂閭縣訴論

今已按驗罪狀帝惡其貪猾委本道以法誅之

王渙為青州壽光令黷貨聚斂強奪下民資糧材木修建私第百姓苦之乃訴於廉使者因鞫劾計贓十餘萬有司以聞帝怒開平二年三月委本郡長吏准格處分尹崇規為青州北海令殘虐於民賄賂彰顯開平二年七月委本道長吏斃之

後唐張延輝為許州臨潁令明宗長興元年九月為縣人韋知進所訟稱知進父克所繇為衙叅不到決杖致

死又論延輝取贓賂法司估計錢三十三貫以絹平之
得絹二十二疋准法決重杖一頓處死主簿高延誨罰
兩月俸

楊鐔為鼓城令長興四年七月鎮州奏鐔與主簿徐延
同情出賣官麴一十二碩計錢三十八千估絹三十四
疋二丈其錢入已破使事下法司大理正張仁瑑刑部
郎中康澄斷准律主當監官罪並當絞徐延專掌賣麴
縣令監臨據罪並絞關連典吏笞杖徒流有差從之

呂澄為秦州清水縣令長興四年七月觀察使奏澄於
長興元年二年三年相以乞斂人戶財物共計一千一
百二十九碩顯貼貫計賊三百六十八貫事下法司大
理少卿康澄斷准律受所監臨賊罪當贖流三千里呂
澄以兩任官當三年徒罪餘二年徒罪徵銅四十斤刑
部員外郎薛冲又詳覆呂澄贓賂事發因鎮將上論乞
取之賊又無文簿鎮將遍下鄉村勘問又無人戶姓名
積數雖多未嘗正格量其情狀難逭刑章勅旨呂澄命

為宰字委以民人不守公廩恣行聚斂贓數甚廣情狀
難矜當寘重刑仍從遠竄宜決脊杖二十配流嵐州關
連人吏依法司所奏

晉郭綰為絳州翼城令少帝開運二年法寺奏綰乞門
戶人粟八百一十五碩五斗計賊絹八十疋准律徒四
年以官當注毀四任告勅流三千里從之

周陸憲為曹州寃句令太祖廣順元年十月坐贓絳五
萬兩先是本部民楊文投匭論憲下開封府推鞠憲以

本部內放絲伏罪獄成追毀入任官牒

陳守愚為唐州方城令廣順三年二月在任尅留人戶
蠶一千五百斤貨之兼丐率資金為民所訟守愚攜牌
印自訴於闕下御史臺推劾伏罪杖死之

冊府元龜卷七百七

欽定四庫全書

冊府元龜卷七百八

宋 王欽若等 撰

宮臣部

總序

古之有天下者必立儲貳用承統緒並建子弟以屏王室莫不內制宮朝之秩外設國藩之職為之輔佐焉唐虞之前官次莫記夏商之際教世子之法太傅在前少傅在後入則有保出則有師

晉荀綽百官表云太子太傅唐虞官而未詳所得

動有司過之史處有徹膳之宰所以翼導乎元良教喻而成德者也周監二代建職制吏地官司徒之屬有師氏掌以三德教國子中大夫一人上士二人保氏掌養國子以道教以六藝下大夫一人中士二人夏官司馬之屬有諸子掌國子之倅掌其戒令下大夫二人中士四人皆有胥徒府史之屬

燕義云周天子官有庶子是也

斯皆六聯之

內左右太子者也而太傅居三公論道之位少傅當三

孤貳公之任職在經緯匪專輔導

班彪云成王為孺子時出則周公召公史

佚入則太顛閔天南宮括散宜生左右前後賈誼云成王在襁褓之中置三少皆上大夫人曰少保少傅少師與太子宴者也又幽王時列國太子亦有師傅少師之名有太子傳作小弁之詩

晉杜元歙為太子中書傅楚潘崇為太子商臣師伍奢為太子建師費無極為太子建少師戰國亦

置師傅

秦商鞅點孝公太子師傅

秦立百官之職因古制設太子太

傅少傅增置屬官有太子門大夫庶子各五人洗馬十

六人掌前驅舍人無員又置詹事掌太子家有丞屬官

有太子率更家令丞僕中盾衛率厨廩長丞率更掌知

漏刻中盾主周衛徼道衛率主門衛漢氏因之而大裂

疆土分王子弟宮室百官同制京師王國有太傅輔王

內史治國民中尉掌武職丞相統衆官羣卿大夫都官

如漢朝

國家惟為置丞相其御史大夫以下皆自置之羣卿已上皆秩二千石

景帝中五

年改丞相曰相省御史大夫廷尉少府宗正博士官大

天謁者郎諸官長丞皆損其員

時七國之亂抑損諸侯王始令諸國皆天子為

置武帝改丞僕曰僕

并郎中令皆損其秩為千石

成帝綏和元年省

內史更令相治民如郡太守中尉如郡都尉而太子宮

復有左右戶將左右戶直郎後漢省之及省詹事員而

太傅專職輔導不領官屬少傅亦司輔導而悉主諸職
員吏十二人以率更令主庶子舍人更直職比光祿屬
官庶子舍人皆無員庶子如三署郎舍人如三署郎中
一云舍人一十三人選良家子充家令主倉穀飲食職比司農少府屬

官增置太子倉令一人主倉庫太子食官令一人主飲

食太子僕主車馬職如太僕屬官廄長一人主車馬門

大夫比郎將

一云員二人選四府掾屬充

增置中庶子員五人職如

侍中洗馬職如謁者

選以郎中補

中盾衛率如故皇子封王

者並置傅相相有長史如郡丞餘諸卿皆如舊制又有

大夫無員掌奉王使至京都奉璧賀正及使諸國皆持

節舊有尚書尋改治書又更名大夫

謁者掌冠長員十六人禮樂長主

樂人衛士長主衛士醫工長主醫藥永巷長主宮中婢

使宦者為之

祠祀長主祠祀又有郎中無員二漢以來嘗以

詹事少傅主太子家然時有以他官監護娛侍輔導者

孝宣欲以中郎將監護太子又以王褒劉向張子僑等

娛侍太子元帝以侍中史丹護太子家光武以侍中陰

識守執金吾輔導太子順帝立太子居承光宮以侍御史种暭監護之

魏國初建太子官

屬率擬漢臺之制而別有太子侍講嘗從虎賁督保傅

丞東宮摘句郎其諸王國別有文學監國謁者典書令

家令都尉長史司馬之職其侯國又有家丞

武帝選邢顯為平原

侯桓家丞陳思王有監國謁者灌均

明帝已後東宮制度廢闕官司不具

惟置衛率令典兵二傳并攝衆事他皆闕焉蜀有太子

太傅家令舍人中庶子庶子之名

後主為太子以諸葛亮為太子太傅兼周

為太子家令董允為太子舍人後主立太子璿戈冲為中庶子李譔為庶子

吳有左輔右弼

輔正翼正二都尉為太子四友亦有太傅少傅中庶子

之官

孫權立子登為太子以諸葛恪為左輔張休為右弼顧譚為輔正都尉陳表為翼正都尉是為四友

孫和為太子以闕澤為太傅薛綜為少傳及以中庶子為親近之官

晉武帝泰始二年始

建東宮損益前制備置官屬以太子太傅少傅總宮事

並有功曹主簿五官

太傅少傅專職訓導後以儲副體尊遂命諸公居之以本位重故或

行或領蓋一時之制也

始置中衛率其中庶子正置四人

皆以俊茂者為

之或以郡守參選

其食官令一人職如太官令庶子四人比散

騎常侍中書監令太子舍人十六人比散騎中書侍郎

從駕則正直從次直守妃出則次直從洗馬八人准秘

書郎掌圖籍釋奠講經率更令主宮殿門戶及賞罰事

職如光祿衛尉家令主刑獄穀貨飲食職比司農少府

丞一人

後漢以家令主食官令至是食官自為官不復屬家令

僕主車馬親秩如

太僕宗正諸王置師友文學各一人後改師為傅

避景帝諱

改太守為內史省相及僕有郎中令中尉大農為三卿

大國置左右常侍各一人省郎中置侍郎二人典書典

祠典衛學官令典書丞各一人治書四人中尉司馬世

子庶子陵廟牧長各一人謁者四人中大夫六人舍人

十人典醫典府丞各一人

公國無中尉常侍侯國又無大農侍郎伯子男惟典書已

下無學官令史皆以次損公侯置官屬皆隨國大小無定制其餘官司各有差皆選其文武官五年分

中衛率為左右衛率各領一軍咸寧元年復置詹事掌

宮事二傳不復領官屬大國置上中下軍三將軍次國

上下二將軍小國上軍後又省詹事崇廣傳訓之職置

太子太保并太傅皆以諸公領之少傅亦以重官兼領

吏屬如舊四年始置中舍人四員以舍人才學美者為

之與中庶子共掌文翰職如黃門侍郎惠帝元康元年

復置詹事職擬尚書令掌三令四率中庶子庶子洗馬
舍人等官丞一人主簿五官掾功曹史主記門下史錄
事戶曹法曹倉曹賊曹功曹書佐門下亭長門下書佐
省事各二人愍懷建宮乃置六傳三太三少

太師後避
景帝諱改

為太保而詹事文書皆關通六傳自元
康已後諸傳不備或二或三或四或六加置前後二衛

率各有丞一人永康中又不置詹事惟置丞一人擬尚
書左右丞掌奉行文書關通六傳又置中衛率是為五
率太安已來復置詹事江左有太傅少傅不立師保省

前後二率

詹事丞用員外郎博士為之遷尚書郎

孝武太元中又復前後

二率僭偽諸國亦有東宮藩國諸職

前趙劉乂為皇太子有太師太傅太

保東宮舍人劉曜時又有太子少師前秦苻堅有太子舍人後秦姚萇為秦王置左右長史司馬掾屬叅軍及

為太子又置中舍人洗馬宋氏之始東宮王國皆循晉制惟二傅各

加置丞一人以家令率更令僕為太子三卿倉官令屬

中庶子止置左右二率增置屯騎步兵翊軍校尉各七

人冗從僕射七人旅賁中郎將十人又置左右積弩將

軍左十人右二人殿中將軍十人殿中員外將軍二十

人復置門大夫一人王國師改為傅餘皆無改齊因宋

制二傅詹事始稱府無庶子官復置常從虎賁督王國

改傳為師置典籤帥增置食官廩牧長倉官令

無內史治書司

馬世子庶子庶廟長中大夫舍人典醫典府丞公侯國惟置郎中令一卿自魏

晉已來諸王多領將軍州鎮而王國屬官率兼幕府之

職

若長史司馬參軍別駕治中祭酒儀曹從事史功曹兵曹書佐主簿掾屬東西閣祭酒之輩

梁以

太子太傅視尚書令少傅視左僕射詹事視中護軍任

總官朝門大夫視謁者僕射通事舍人視南臺御史

多以

他官左率領果毅統遠立德建左右衛率視御史中丞寧陵鋒夷寇祚德等七營

右率領崇營永吉崇和細射等四營二率各置殿中將軍十人正員司馬

四人又有員外司馬督官而旅賁中郎將冗從僕射左

右積弩將軍各置一人又置通事守舍人典法守舍人

以中庶子功高者一人為祭酒中舍人庶子功高者各一人與中庶子祭酒共掌其坊之禁令而以舍人專掌

文置典經局洗馬八人視通直郎掌文翰取甲族有才名者為之

屬官有典經守舍人典事守舍人無員又有外監殿局

內監殿局導客局齋內局主墾主衣扶持等局復有門

局錫庫局內殿局中藥藏局食官局外殿局車殿局

各有

司存以承其事

皇弟皇子府置師長史司馬從事中郎諮議參

軍友掾屬中記室中直兵等參軍功曹史錄事記室中

兵等參軍文學主簿正參軍行參軍長兼參軍等員

王副

府減師友文學長兼行參軍藩王府減從事中郎諮議參軍掾屬錄事記室中兵參軍等員

王國復

置廟長陵長典醫典府丞舍人中大夫增置執書中尉

嗣王國惟置郎中令常侍大農寺員藩王又省常侍餘皆循前制

天監初置東宮常侍

以散騎常侍為之

六年詔家令視通直常侍率更僕視黃門皆

置丞

東官三卿宋齊已來清流者不為之至是武帝始詔革其選

七年以太子中舍

人司從中郎為庶子

自齊庶子用人卑雜至是詔革其選

大通三年又置

金華家令

以昭明太子妃居金華宮

陳仍梁制東宮惟置太傅而無

師保又有東宮學士之員王府藩國正員之外復有版

授之職後魏起於北土亦封建王侯因郡為國其大郡

王國吏二百人次郡王國一百人皆立典師職比家丞

總統羣師太武延和三年始立東宮備置屯衛比西宮

三分之一孝文太和中始定官品東宮之屬增置太子

主書主衣舍人典書典衣令史左右衛率主簿而分詹

事為左右改食官令為食官長復置中盾之名

其三太
三少左

右衛率中庶子庶子三卿三授官常從虎賁督守中舍人洗馬門大夫舍人倉令廐長詹事五官舍人並仍舊

制王國置王家尉王家吏

諸王師友
皆仍舊號

亦置皇子府官屬

別有開府從事中郎開府掾屬郎中令列曹叅軍事開

府祭酒中尉叅軍事列曹叅軍事侍郎上中下將軍叅

軍督護中大夫二率丞典書典衛典祠學官等四令

餘
並

同梁
制

其始藩王二藩王三藩王之官屬有長史司馬諮

議叅軍錄事叅軍事功曹記室戶曹叅軍中兵叅軍事

功曹史主簿列曹叅軍事列曹行叅軍叅軍督護

一云皆有

師傳

又有王公國置郎中令太農中尉常侍侍郎上中下

將軍中大夫等官北齊制官多循後魏而東宮職局統

領有異以詹事總內外衆務領三寺左右率二坊

置司馬功

曹主簿以丞其事

家令寺領食官典倉司藏等署令丞又領內

坊令丞食官又別領器局酒局二丞典倉又別領園丞

司藏又別領仗庫典作二局丞率更等領中盾署令丞

僕寺領廢牧署令丞車輿局丞左右衛署防率各領騎
官備身正副都督騎官備身五職騎官備身又有內直
備身正副都督內直備身五職內直備身而又有備身
正副都督備身五職備身直閣直前直後等員又有旅
騎屯衛典軍校尉各二人騎尉三十人門下坊有中庶
子中舍人通事守舍人主事守舍人各四人領殿內局
內直監六人副直監四人典膳局監丞各二人藥藏局
監丞各二人侍醫四人齋帥局齋帥內閣帥各二人典

書坊庶子四人舍人二人十人領典經坊洗馬八人守
舍人二人門大夫坊門大夫主簿各一人又統伶官西
涼二部清商二部王置師一人皇子王國置郎中令大
農中尉常侍各一人侍郎二人上中下三將軍各一人
上中大夫各二人防閣四人典書典祠學官典衛令各
一人齋帥四人食官廩牧長各一人典醫丞二人典書
二人謁者四人舍人十人諸王國增置陵長廟長常侍
各一人上中大夫各減一人并減中將軍

諸公又減防
閣齋帥典衣

丞等員侯伯子男又減諸國公將軍大夫員

後周武帝六官之建有小師氏

保氏司戎司武司衛等員皆宮衛之職而諸侯之宮謂

之外命建德二年增改東宮官員三年置太子諫議大

夫四人文學十人皇弟皇子各置友二人學士六人後

又置太子宮正宮尹諸王侍讀隋室革命官名俱復置

三太三少以二坊分統諸局

以門下內史二省開皇初置詹事二年罷之

門

下坊左庶子二人內舍人四人錄事二人主事二人主

事令史四人所統六局司經局洗馬四人校書六人正

字二人

時又有太子學士史不載其員

宮門局大夫二人內直局監副

監各二人監殿舍人四人典膳局監丞各二人藥藏局

監丞各二人侍醫四人齋帥局齋帥四人典書坊右庶

子二人舍人通事舍人各八人錄事二人主事令史四

人又有內坊典內及丞各二人丞直四人錄事一人內

殿尉二人其家令率更令僕三寺各置丞

家令寺二人二寺各一人

家令領三署食官署令一人食官二人典倉署令一人

典倉一人司藏署令一人司藏三人僕寺領廩牧令一

人凡五衛十率左右衛各置率一人副率二人有長史司馬錄事功曹兵騎兵等曹叅軍事法曹鎧曹行叅軍各一人行叅軍四人又別置直閣四人直寢八人直前直後各十人左右宗衛官如左右衛各置行叅軍二人宗衛掌以宗人侍衛無直閣直寢直前直後等員

如左右衛止置行叅軍一人

虞候掌斥候伺并無錄事叅軍員

左右內

率各一人官與虞候同別有千牛備身備身左右各八

人備身二十人

內率掌領備身以上禁內侍衛供奉兵仗無功騎兵法等曹及行叅軍員千牛

備身掌執千牛刀備身左右掌
供奉弓箭備身掌宿衛侍從左右監門率各一人副

率二人直長十人餘官同內率親王置師友各一人文

學二人長史司馬諮議叅軍事掾屬各一人主簿各二

人錄事功曹記室戶倉兵等曹騎兵城局等叅軍事東

西閤祭酒各一人叅軍事四人法田水鎧士等曹叅軍

事各一人行叅軍事六人長兼叅軍八人典籤二人

時亦

有學士之名史嗣王加置叅軍事一人行叅軍六人

無師

友減主簿錄事叅軍東西閤祭酒自後東宮又有侍講
長兼行叅軍等員餘並同親王府

之職煬帝省內舍人洗馬各二人改家令為司府令宮
門大夫為宮門監通事舍人為宣令舍人正字為正書
左右衛率為左右侍率左右宗衛為左右武衛虞候開
府為左右虞候左右監門率為左右監門將軍唐初多
因隋制復置詹事府以統東宮衆務增置少詹事復以
司府令為家令宮門監為宮門大夫宣令舍人為通事
舍人內舍人為中舍人正書為正字左右侍率為左右
衛率增置親勳翊三府中郎將各一人郎將二人左右

武衛為左右宗衛左右監門將軍為左右監門率餘皆如舊時秦王齊王府官之外各置左右六護軍府及左

右親事帳內府

左一右一護軍府護軍各一人副護軍各二人長史錄事參軍及史各一人倉

兵鎧曹參軍事并府史各一人統軍各五人將各一人左二右二左三右三護軍府各減統軍三人別將六人餘職員並同左右親事府統軍各一人長史錄事參軍事并史各一人兵鎧曹參軍事并府史各一人左右別將各一人帳內府同又有秦王又置天策上將府官員庫直及驅咥直量事置之

長史司馬各一人從事中郎二人軍諮祭酒二人典籤四人主簿錄事記室參軍事功倉兵騎鎧士等曹參軍事各二人參軍事六人六曹各有令史書令史等又置文學館學士
以房喬等十八人為

之武德七年定令東宮置三師三少詹事府三坊三寺

十率府王公已下定置府佐國官

是時王府置師及常侍侍郎舍人之職又

有侍讀其太子亦有侍讀並以他官領之其後多以重官領詹事庶子

太宗貞觀初改太

子中舍人為中允復置中舍人

以中允擬黃門侍郎中舍人擬中書侍郎中舍

人又謂之太後又置崇賢館有學士直學士及讎校之

子中書舍人職崇賢館掌經籍圖書

教授諸生隸門下坊十八年又於門下坊置太子司

議郎四人

時皇太子請置史職以司箴戒乃置北官妙簡名士掌侍從規諫駁正啟奏并錄東宮記

註分判

坊事高宗永徽三年改中允為內允中舍人為內舍

人尋復舊

初避皇太子忠諱
俄太子遜位而復

顯慶元年置太子賓客四

人

漢高將廢太子時東園公綺里季夏黃公內里先生
侍從太子為賓客卒護太子至武帝又為太子立博

望苑以通賓客若有宴賜則太子賓客皆預焉晉元康
元年愍懷太子在東宮惠帝詔太保衛瓘息庭司空隴

西王泰息略太子太傅楊濟息瑳太子少師裴楷息憲
太子少傅張華息禕尚書令華廙息常游處太子左右

謂之東宮賓客皆非官也至是乃以太子少傅兼侍中
韓瑗中書令朱濟禮部尚書許敬宗左僕射兼太子少

師于志寧為太子賓客遂為
正官員四人以象四皓焉

龍朔二年改詹事府為端

尹府詹事為端尹少詹事為少尹門下坊為左春坊典

書坊為右春坊左右庶子為左右中護中允為左贊善

大夫中舍人為右贊善大夫司議郎為左司議郎舍人
為右司議郎洗馬為司經大夫家令寺為宮府寺令為
宮府大夫率更寺為司更寺令為司更大夫僕寺為馭
僕寺僕為馭僕大夫典膳藥藏內直三局監宮門大夫
並為郎內直郎擬尚輦奉御齋帥為典設郎左右衛率
府為典戎衛左右宗衛率府為司禦衛左右虞候率府
為清道衛左右監門率府為崇掖衛左右內率府為奉
裕衛太子千牛為奉裕三年置太子左右諭德各一人

擬散騎常侍

分司經局置桂坊置令一人司直二人太子文

學四人

坊比御史臺令比大夫司直比直侍御史職在彈劾以肅宮寮以崇賢館隸之

未幾廢

桂坊改崇賢館為崇文館

桂坊之廢以司直隸詹事文學隸司經崇賢館復隸春坊

尋避沛王賢諱又改館名

咸亨元年官名並復舊仍置贊善大夫左

右各五員

左庶子擬侍中右庶子擬中書令司議郎擬給事中贊善擬諫議大夫

又以諸

衛依舊為率府

惟司禦清道奉裕三率府未復舊名

儀鳳四年增置左右

贊善大夫各十員以授諸王之子

永淳元年立皇孫重昭為皇太孫將置府

寮高宗以問吏部郎中王方慶對曰晉惠帝立愍懷子襄陽王尚為皇太孫時皇太子官屬即轉為皇太孫官屬

南齊永明中立文惠太子昭業為皇太孫便居東宮帝悅使方慶定官屬乃奏太孫府置師傅友文學祭酒長史曹掾主簿管記司錄已下六曹從事等官各加王府一級事亦不行

則天垂拱元年又

以詹事府為宮尹府詹事為宮尹少詹事為少尹左右

監門率府為鶴禁衛率府鎧曹為胄曹中宗神龍元年

復詹事府官號又以司禦衛率府為宗衛率府清道衛

率府為虞候率府鶴禁衛率府為監門率府左右奉裕

衛為內率府時又以他官檢校太子賓客

秘書監楊敬
太常卿武崇

訓並檢校
太子賓客

睿宗景雲元年復以門下坊為左春坊典書

坊為右春坊二年改王府師為傅令贊善大夫兼用庶
姓明皇先天元年詔東宮三師三少宜開府置令丞各
一人隸詹事府等罷開元初復以宗衛率府為司禦衛

率府虞候率府為清道率府

自貞觀至開元凡府衛坊局改易其丞主簿率副率

等官屬皆隨府衛坊局號改復

七年改崇文館讎校為校書二十五年

始總定官數裁為典制太子六傅不必備惟其人無則
闕之以賓客掌贊相禮儀先後太子詹事總三寺十率
之政令二坊掌分領諸職詹事府有丞主簿司直各二

人左右春坊各有庶子二人諭德一人贊善大夫五人

皆分傳令四人又皆有錄事主事令史書令史亭長掌

固員以丞其事左春坊別有中允二人司議郎四人掌

議二人贊善四人其所統有崇文館司經典膳藥藏內

直典設宮門等六局崇文館學士無員學生三十人校

書典書搨書手各二人熟紙匠筆匠各三人裝潢匠五

人司經局有洗馬二人文學三人餘五局皆有郎一人

丞二人司經之屬別有校書四人正字二人典書四人

楷書二十五人典膳之屬別有主食六人典食二百人藥藏之屬別有侍醫四人黃藥藥童各九人內直之屬別有典服三十人典扇典書各十五人典設之屬別有幕士六百人宮門之屬別有門僕一百三十三人而皆有令史書令史書吏掌固等為之吏役右春坊別有中舍人二人通事舍人八人典謁二十一人內坊掌東宮閣內之禁有典內二人丞二人典直四人導客舍人六人閣師六人內給使無員內殿典事亭長各二人駕士

三十人掌固四人家令寺有丞二人主簿錄事各一人
府十人史二十人亭長掌固各四人統食官典倉司藏
三署署各有令丞一人食官署別有掌膳十二人供膳
四百人奉饌三十人典倉署別有園丞二人典事六人
司藏署別有典事四人皆有府史掌固之屬率更寺有
丞一人府三人史四人伶官師二人漏刻博士二人掌
漏六人漏童六人典鼓二十四人餘官如家令寺僕寺
史五人丞府如率更寺餘官如家令寺領廩牧署有典

乘牧長各四人典事六人翼馭十五人駕士三十人獸
醫二十人餘職如食官等署左右衛率府左右司禦率
府左右清道率府各置率一人副率二人長史錄事叅
軍事錄事并史各一人倉兵曹叅軍事各一人府史
各有差又有亭長掌固中候司戈各二人司階一人執
戟三人左右監門率府左右內率府無倉曹叅軍事以
兵曹兼之又減司階中候司戈執戟等員而監門率府
別有監門直長七十八人內率府別有千牛十六人備

身二十八人主仗六十人餘官並同諸衛其親勲翊三
府仍隸左右衛率府有中郎將左右郎將兵曹叅軍事
錄事并府各一人史二人校尉五人旅帥十人隊正副
隊正各二十人親王府傳諮議叅軍事各一人文學二
人東西閣茶酒長史司馬掾屬主簿各一人史二人記
室叅軍事并史各二人錄事叅軍事叅軍事錄事各一
人史二人功倉戶兵騎法士等曹叅軍并府各一人史
各二人叅軍事二人行叅軍四人典籤二人又有親事

帳內二府親事府典軍副典軍各二人府一人史二人
執仗親事執乘親事各十六人親事三百三十人校尉
旅師隊正隊副准人部領帳內府無執仗等親事之職
別有帳內六百六十七人餘官同親事府親王國有令
一人大農尉各二人丞錄事各一人府五人史十人典
衛八人舍人四人學官長食官丞各一人廩牧典府長
丞各二人二十七年以內坊隸內侍省為局肅宗在宮
邸始置侍書之職

時以韓擇木為侍書

德宗建中四年增賓客二

員興元初又增四員貞元四年復舊員數十六年置太

子侍直

時以山人崔羊為右贊善大夫太子侍直

穆宗長慶元年封鄜王等

十四人王每府惟置傅長史司馬諮議叅軍友功曹叅

軍各一員叅軍二員

唐故事王府官屬隨王之任及在京師各有曹局天寶已後諸王不

出閣所置寮案過於閒冗順宗寶歷中瓊王長史裴簡求始論奏其事自後稍復舊制焉

文宗太和

四年始限流外官不得為東宮五局郎

時左庶子孫革奏青宮則局謨

翼元良必用卿相子弟先擇文學端士近年特有流外出身徵求授任實玷流品當司有司經局校書正字品秩至卑而文學之人求之蓋無有塵雜故也其典膳等五局郎資序本是清品若授流外不已則漸成蔓伏請

吏部今後不擬
流外人詔從之

開成二年諸王又有講讀之職

時劉仲武為講

讀間日入對
諸王授經

五代多故典制未備儲副居尹京之任皇

子分節鎮之職宮國寮吏盖多闕焉惟後唐長興中秦

王府始置官屬

梁開平元年宰臣議親王令建府置寮
屬太祖抑而不行後唐同光初中書門

下秦王府及東宮屬司請未除授至長興四年始以秘
書監劉贊兼秦王傅前忠武軍節度判官蘇瓚為秦王

友前襄州觀察使魚崇
遠為秦王府記室參軍

然自唐室至於五代東宮之

職王府之屬或總領他務或授左降分司致仕官不專

為官府之任若建置儲嫡諸王出閣則官府之職多以

他官兼領及檢校之天寶後武臣及藩鎮牙校幕府僚佐亦多檢校東宮之職以為散官原其擬職上臺輔翊帝嗣列位藩國左右宗親歷代以還授任斯重其有宣亮直之德敦訓導之禮講以經義規以正道懿文秀茂明識淵邃事之盡節臨難不奪膺慎簡之典被隆寵之數洎褻慢求媚典憲是罹者並用論次以垂厥後云爾
凡宮臣部十二門

選任

禮曰凡三王之教世子太傅少傅以養之欲其知父子君臣之道又曰太傅在前少傅在後入則有保出則有師師也者教之以事而喻諸德者也慎諸身以輔翼之而歸諸道也由漢而下曷嘗不茂建儲兩宗樹蕃屏上以貞邦而固本次以強幹而昌世故其左右前後必詢求於正人傅相官屬咸叅取於時彥資乎忠亮賴其老成將以申切磋之益成溫文之美芝蘭俱化允歸於善道磐維克固誕揚於頌聲斯固乃僚慎簡之攸先為邦

令典之稱首者也

漢張良既封留侯性多疾即導引不食穀高祖自將東

擊黥布良強起至曲郵

曲郵在新豐

謂曰子房雖疾強卧傳

太子時叔孫通已為太傅以良行少傳事

周昌為御史大夫時高祖憂趙王如意年少而戚夫人

與吕后有隙用符璽御史趙堯計為趙王置貴強相堯

進言昌為人堅忍伉直自吕后太子及大臣皆素嚴憚

之獨昌可高祖曰善於是召昌謂曰吾固欲煩公

固必煩也

勞也公強為我相趙昌泣曰臣初起從陛下獨奈何中道

而棄之於諸侯乎高祖曰吾極知其左遷

是時尊右卑左故謂貶秩

位為左遷然吾私憂趙念非公無可者公不得已強行於是

徙昌為趙相

賈誼為長沙王太傅歲餘文帝思誼徵之乃拜為梁懷王太傅懷王帝少子愛而好書故令誼傅之

石奮孝文時為大中大夫無文學恭謹無與比時東陽侯張相如為太子太傅免選可為傅者皆推奮奮為太

子太傅

轅固治詩為博士景帝以固廉直拜為清河王太傅

衛綰為中郎將景帝以為廉忠實無他腸乃拜綰為河間王太傅後為中尉賜告歸帝立膠東王為太子召拜太子太傅

石慶為沛守武帝元狩元年立太子選羣臣可傅者以慶為太子太傅

嚴彭祖為東郡太守以高第選太子太傅

韋玄成丞相賢之子宣帝愛淮陽憲王欽欲立之以太子蚤失母故弗忍也久之帝以玄成陽狂讓侯兄經明行高稱於朝廷乃召拜玄成為淮陽中尉欲感諭憲王輔以推讓之臣由是太子遂安

疏受太子太傅廣之兄子也受次公子亦以賢良舉為太子家令受好禮恭謹敏而有辭敏謂所見捷利宣帝幸太子

宮受迎謁應對及置酒宴奉觴上壽辭禮閑雅帝甚

驩說

說讀曰悅

頃之拜受為少傅

史丹字君仲元帝為太子以丹為中庶子侍從十餘年
帝即位為駙馬都尉侍中出常驂乘甚有寵帝以丹舊
臣皇考外屬丹祖父恭有女弟為衛太子良娣信之詔丹護太子家
傳喜少好學問有志行哀帝初為太子成帝選喜為太
子庶子

後漢張佚為博士光武大會百官詔問誰可傳太子者
羣臣承意皆言太子舅執金吾陰識可佚正色曰今陛
下立太子為陰氏乎為天下乎即為陰氏則陰侯可為

天下則固宜用天下之賢才帝稱善曰欲置傳者以輔太子也今博士不難正朕況太子乎即拜為太子太傳杜林為光祿勳時稱通儒有節行會皇太子强求乞自封東海王故重選官屬以林為王傳

何湯豫章人桓榮弟子明帝始立為皇太子選求明經乃擢湯為虎賁中郎將以尚書授太子

陰識為侍中明帝始立為皇太子以識守執金吾輔導

東宮

魏邢顒為左馮翊以病去官時武皇諸子高選官屬令
曰侯家吏宜得淵深法度如邢顒輩遂以為平原侯植
家丞後叅丞相軍事轉東曹掾初太子未定而臨淄侯
有寵丁儀等並贊翼其美太祖問顒顒對曰以庶代宗
先世之戒也願殿下深重察之太祖識其意後遂以為
太子少傅遷太傅

鄭稱為侍中文帝初嗣王位封子敞為武德侯以稱為
傳令曰龍淵太阿出昆吾之金和氏之璧由井里之田

磬之以砥礪錯之以他山故能致連城之價為命世之寶學亦人之砥礪也稱篤學大儒勉以經學輔侯宜旦夕入侍曜明其志

司馬孚宣王次弟時陳思王有俊才清選官屬以孚為文學掾

蜀董允字休昭時掌軍中郎將和之子先主立太子允以選為舍人

李譔字欽仲延熙元年後主立太子以譔為庶子遷為

僕射轉中散大夫右中郎將猶侍太子太子愛其多知甚悅之

吳闕澤字德潤宛廐羣籍孫和為太子以澤為太子太傅又以薛宗為少傅而蔡潁張純封輔嚴維等皆從容侍從

程秉字德樞汝南南頓人也避亂交州大帝聞其名儒以禮徵秉既到拜太子太傅

張溫字惠恕父允名顯州郡少修節操容貌奇偉大帝

聞之以問公卿曰溫當今與誰為比大司農劉基曰可與全琮為輩太常顧雍曰基未詳其為人也溫當今無輩帝曰如是張允不死也徵到延見文辭占對觀者傾竦帝改容加禮尋遷太子太傅

陳表字文奧孫登為太子表及諸葛恪張休顧譚等以遷入傳講詩書出從騎射太傅張溫言於大帝曰夫中庶子官最親密切問近對宜用俊彥於是乃用表等為中庶子

華融字德挺祖父避亂居山陰時皇象亦寓居山陰吳郡張溫來就象學欲得所舍或告溫曰有華德挺者雖年少美有令志可舍也溫遂止融家朝夕談講俄而溫為選部尚書乃推擢融為太子庶子

晉鄭袤陽開封人魏武帝初封諸子為侯精選賓友袤與徐幹俱為臨淄文學

郭奕性剛正武帝踐祚初建東宮以奕及鄭默並為中庶子

何邵為中書監惠帝永熙元年以初建東宮太子年幼
欲令親萬機故盛選師傅以邵為太子太師吏部尚書
王戎為太子太傅衛將軍楊濟為太子太保裴楷為少
師張華為少傅和嶠為少保

劉寔為散騎常侍愍懷太子初封廣陵王高選師友以
寔為師孟珩為友楊準馮蓀為文學及建東宮又詔曰
適尚幼蒙今出東宮惟當賴師傅羣賢之訓其游處左
右宜得正人使共周旋能相長益於是使太保衛瓘息

庭司空泰息略太子太傅楊濟息斐太子少師裴楷息
憲太子少傅張華息禕尚書令華廙息常與太子游處
以相輔導焉

高光為散騎常侍從惠帝還雒陽時太弟新立重選傳
訓以光為少傅加光祿大夫常侍如故

孔坦少方直有雅望善左氏傳解屬文元帝為晉王以
坦為世子文學東宮建補太子舍人

丁潭為尚書祠部郎元帝建武初琅邪王裒始受封帝

欲引朝賢為其國上卿將用潭以問中書令賀循循曰
郎中令職望清重寔宜審授潭清淳貞粹雅有隱正聖
明所簡才實宜之遂為琅邪王郎中令

顧榮字彥先吳人也時入雒者惟陸機陸雲及榮三人
而已以南州望士補吳王郎中令

王衍舉遼東太守不就以名聞超為太子舍人

賀循字彥先元帝時為中書令以老疾固辭拜太子太
傅詔曰循清直履道秉尚真實居身以冲約為本立德

以仁讓為行可躬訓儲宮默而成化

周顓太興初明帝為太子顓以吏部尚書更拜太子少
傅顓上疏讓曰臣退自循省學不通一經智不效一官
止足良難未能守分遂忝顯任名位過量不悟天監忘
臣頑弊乃欲使臣內管銓衡外忝傳訓質輕蟬翼事重
千鈞此之不可不待識而明矣若臣受負乘之責必貽
聖朝惟塵之恥俯仰愧懼不知所圖詔曰紹幼冲便居
儲副之貴當賴軌匠以祛蒙蔽望之儼然斯不言之益

何學之習邪所謂與田蘇游忘其鄙心者便當副往意
不宜冲讓

殷仲堪少好學能清言善屬文人士咸欽愛之以孝行
稱康帝聞其名召為太子中庶子甚相知悅

顏含為東陽太守東宮初建含以儒素篤行補太子中
庶子

傅暢右僕射祗之子年未弱冠甚有重名以選入侍講
東宮為秘書丞

孔安國為領軍將軍安帝詔曰安國貞慎清正外內播
譽可以本官領東海王師必能導達津梁依仁游藝
宋裴松之為高祖治中從事史既克洛陽高祖敕曰松
之廊廟之才不宜久尸邊務今召為世子洗馬與殷景
仁同可令知之

王惠字令明為世子征虜長史宋國初建嘗置郎中令
高祖難其人謂傅亮曰今用郎中令不可減素曜卿也
既而曰吾得其人矣乃以惠居之遷世子詹事

王僧達太保弘之少子也少好學善屬文年未二十以
為始興王後軍參軍遷太子舍人

謝述從兄曜為義康王長史喪官述代之太祖與義康
書曰今以述代曜其才應詳練著於歷職故以佐汝汝
始親庶務而任事殷宜寄懷羣賢以盡弼諧之美想自
得之不俟吾言也

謝超宗解褐奉朝請孝武帝寵子子鸞為新安王超宗
以選補國常侍

齊王僧虔弱冠寬厚宋孝武時自太子中庶子出為豫章王子尚撫軍長史遷散騎常侍復出為新安王子鸞北中郎長史東海太守行南徐州事二藩皆帝愛子也王琨為歷陽內史初仕宋孝武以琨忠實徙為寵子新安王東中郎長史加輔國將軍遷右衛將軍度支尚書出為永嘉王左軍始安王征虜二府長史加輔國將軍廣陵太守皆孝武諸子

謝顥武帝永明初高選文學以顥為竟陵王友

何昌寓永明初為竟陵王子良文學以清信相得意好甚厚

王景文明帝時為中書監領太子太傅景文固辭太傅帝遣新除尚書右僕射褚淵宣旨以古來比例六事詰難之不得已乃受拜

張緒字思曼清簡寡欲明帝時為太子中庶子遷司徒左長史吏部尚書袁粲言於帝曰臣觀張緒有正始遺風宜為宮職轉中庶子

梁沈約初仕齊為步兵校尉惠文太子入居東宮約管書記當時王侯到官或不得進約每以為言太子曰吾生平懶起是卿所悉得卿談論然後忘寢卿欲我夙興可常早入遷太子家令

徐勉為太子中庶子侍東宮昭明太子尚幼時選極親賢妙盡時譽勉陳讓數四又與沈約書授侍講詔不許然後就焉轉太子詹事又改授侍中頻表解官職優詔不許

王規天監中為中書黃門侍郎敕與陳郡殷均瑯邪王
錫范陽張緬同侍東宮俱為昭明太子所禮

到洽天監中為太子中舍人與庶子陸倕對掌東宮管
記俄為侍讀侍讀省仍置學士二人洽復充其選

陸襄大通中為太子中庶子會昭明太子薨妃蔡氏
別居金華宮以襄為中散大夫領步兵校尉金華宮家
令知金華宮事

劉杳為東宮通事舍人昭明太子薨新宮建舊人例無

停者敕特留杳焉

庾於陵為太子洗馬舊東宮官屬通為清選洗馬掌文翰尤其清者近世用人皆取甲族有才望時於陵與周捨並擢充職高祖曰官以人而清豈限於甲族時論以為美

徐摛為左衛司馬會晉安王出戍石頭高祖謂周捨曰為我求一人文學俱長兼有行者欲令與晉安游處捨曰臣外弟徐摛形質陋小若不勝衣而堪此選高祖曰

必有仲宣之才亦不簡其容貌以摛為侍讀普通四年
晉安王為西平將軍寧蠻校尉摛為王諮議

徐陵摛之子也叅晉安王寧蠻府軍事大通二年王立
為皇太子東宮置學士陵充其選

孔休源為宣惠晉安王尉長史南郡太守行荊州府州
事高祖謂之曰荊州總上流衝要義高分陝今以十歲
兒委卿善輔翼之勿憚周昌之舉也對曰臣以庸鄙曲
荷恩遇方揣丹誠效其一割帝善其對乃敕晉安王曰

孔休源人倫儀表汝年尚幼當每事師之

宗史字明敷武帝嫡孫南郡王居西州以史管書記史既以筆札被知貞正見許故任焉俄而文惠太子薨王為皇太孫史仍舊管書記

庾肩吾為中庶子初簡文在藩雅好文章士時肩吾與東海徐摛吳郡陸罩彭城劉遵劉孝儀弟孝威同被賞接及居東宮又開文德省置學士肩吾子信摛子陵吳郡張長公北地傳弘東海鮑至等充其選

王褒為秘書丞時宣城王大器簡文帝之冢嫡即褒之
姑子也于時盛選僚佐乃以褒為學士

陳蔡景歷為高祖記室時衡陽獻王昌為吳興郡昌年
尚少吳興王之鄉里父老故人尊卑有數高祖恐昌年少
接對乖禮乃遣景歷輔之

王瑒為中庶子父冲嘗為瑒辭中庶子文帝顧謂冲曰
所以久留瑒於承華正欲使太子微有瑒風法耳

虞寄自閩還朝文帝謂劉仲舉曰衡陽王既出閣雖未

置府僚然湏得一人旦夕游處兼掌書記宜求宿士有
行業者仲舉未知所對文帝曰吾自得之乃手敕用寄
寄入謝帝曰所以暫屈卿游藩者非止以文翰相煩乃
令以師表相助也

陸繕為太子中庶子領步兵校尉掌東宮管記繕儀表
端麗進退閑雅文帝使太子諸王咸取則焉其趨步躡
履皆令習繕規矩除尚書吏部郎中步兵如故仍侍東
宮

顧野王宣帝太建中為國子博士後主在東宮野王兼東宮管記遷太子率更令兼通事舍人時宮僚有濟陽江總吳國陸瓊北地傅綽吳興姚察並以才學顯著論者推重焉

陸瓊為中書侍郎太子家令長沙王為江州刺史不循法度宣帝以王年少授瓊長史行江州府國事帶尋陽太守瓊以母老不欲遠出太子亦固請留之遂不行

後魏車路頭代人也道武時以忠厚選給東宮為明元

帳下師

谷渾明元時為前鋒將軍從幸河南還選給事東宮

盧魯元敏而好學寬和有雅度明元時選為直郎以忠謹給侍東宮恭勤盡節太武親愛

李靈字虎符太武時為淮陽太守以學優溫謹選授文成經

李敷字景文選入中書教學以忠謹給事東宮

盧誕本名恭祖為給事黃門侍郎太武詔曰經師易求

人師難得朕諸兒稍長欲命卿為師於是親幸晉王第
敕晉王以下皆拜之於帝前因賜名曰誕加征東將軍
散騎常侍

陸馥獻文將禪位於京兆王子推隴西王源賀並固諫
馥抗言曰皇太子聖德承基四海屬望不可橫議干國
之紀臣請刎頸殿廷有死無二久之帝意乃解詔曰馥
直臣也其能保吾子乎遂以馥為太保

鄭羲孝文延興初為散騎常侍中山王叡寵幸當世並

置王官義為其傳

祖瑩太和中為司徒彭城王勰法曹行叅軍孝文顧謂
勰曰蕭贍以王元長為子良法曹今為汝用祖瑩豈非
倫匹也勅令掌勰書記

高諒字脩賢太和末京兆王愉開府辟召孝文妙簡僚
佐諒與隴西李仲尚趙郡李鳳起等同時應選

游肇孝文時為太子中庶子以謹素敦重文雅見任

李冲為侍中吏部尚書時咸陽王禧自冀州刺史朝京

師孝文詔曰仲尼在鄉黨猶尚恂恂周文王為世子卑躬求道禧等雖連蔓宸暉得不尊尚師傅也故欲為置之以嘉令德廷尉卿李冲可咸陽王師東宮既建拜太子少傅

楊機少有志節為士流所稱宣武時解褐奉朝請於時皇太子國官多非其人詔選清直之士機見舉為京兆王愉國中尉愉甚敬憚之

崔光宣武延昌初為中書監帝幸東宮召光與黃門甄

琛廣陽王淵等並賜坐詔光曰卿是朕西臺大臣當令
為太子師傅光起拜固辭詔不許即命孝明出從者十
餘人敕以光為傅之意令孝明拜光又拜辭不當受太
子拜復不蒙許孝明遂南面再拜詹事王顯啟請從太
子拜於是宮臣畢拜光北面立不敢答拜惟西面拜謝
而出

裴伯茂西魏出帝永興中以廣平王贊盛選賓僚以伯
茂為文學

北齊李鉉為太子博士高祖令世宗在京妙簡碩學以教諸子世宗以鉉應旨徵詣晉陽時中山石曜北平陽絢北海王晞清河崔瞻廣平宋欽道及工書人韓毅同在東館師友諸王

李渾文宣太保初除太子少保邢邵為少師楊愔為少傅皆以為榮

封孝琰為太子舍人出入東宮甚有令望丁母憂解任除晉州法曹叅軍尋徵還復除太子舍人

王晞孝昭皇建初為丞相從事中郎時百官請建東宮
敕未許每令晞就東堂監視太子冠服導引趨拜為太
子太傅晞以局司奉重綬皇太子釋奠又魚中庶子帝
謂曰今既當劇職不得尋常舒慢也晞淹雅有器度神
武訪朝廷子弟忠孝謹密者令與諸子游晞與清河崔
瞻頃丘李度范陽盧正通首應此選文襄時為大將軍
握晞等手曰我弟並向成長志識未定近善狎惡可移
吾弟不負義方即祿位常亞舍弟若苟使回邪致相誑

誤罪及門族非止一身晞隨神武到晉陽補中外府功曹叅軍帶常山公演友

崔瞻為征虜將軍孝昭踐祚皇太子就傳受業詔除太子中庶子徵赴晉陽敕專在東宮調護講讀及進退禮度皆歸委焉

馮子琮為東宮管記又奉別詔令共胡長粲輔導太子轉庶子

孫靈暉後主時為潼郡太守天統中敕令朝臣推舉可

為南陽王綽師者吏部尚書尉瑾表薦靈暉徵為國子
博士授南陽王經綽雖不好文學亦甚相敬重啓除其
府諮議叅軍綽除定州刺史仍隨之鎮綽所為猖獗靈
暉惟默默憂頓不能諫正綽欲以管記馬子結為諮議
叅軍乃表請轉靈暉為王師以子結為諮議朝廷以王
師三品啓奏不合後主於啓下手答云但用之仍手報
南陽書並依所請儒者甚以為榮

後周裴文舉字道裕少忠謹涉獵經史西魏大統十年

起家奉朝請遷丞相府墨曹叅軍時太祖諸子年幼盛簡賓友文舉以選與諸公子游雅相欽敬未嘗戲狎

隋蘇亮初仕西魏文帝為中書舍人魏文帝子宜都王武為秦州刺史以亮為司馬帝謂亮曰黃門侍郎豈可為秦州司直以朕愛子出藩故以心腹相委勿以為恨臨辭賜以御馬

尉遲運初仕周明帝為右司衛時宣帝在東宮親狎諂佞數有罪失武帝於朝臣內選忠諒鯁正者以輔弼之

於是以運為右宮伯建德三年帝幸雲陽宮又令運以本官兼司武與長孫覽輔皇太子居守

李徹字廣達初仕周武帝為左武衛將軍後入隋及煬帝為晉王鎮并州妙選府官詔徹總晉王府軍事進爵齊安郡公時蜀王秀亦鎮益州帝謂侍臣曰安得文同王子相武如李廣達者乎其見重如此

顏之儀初仕後周明帝為麟趾殿學士稍遷司書上士武帝初建儲宮盛選師傅以之儀為太子侍讀

明克讓高祖受禪拜太子舍人率更令于時東宮盛徵天下才學之士至于博學洽聞皆出其下

褚亮初仕陳為尚書殿中侍郎開皇中陳亡入京文帝詔亮侍游東宮為太子學士

蘇孝慈開皇中為兵部尚書待遇愈密時皇太子勇頗知時政帝欲重宮官之望多令大臣領其職于是拜孝慈為太子右衛率尚書如故

張虔威字元敬開皇初煬帝為晉王出鎮并州盛選僚

佐以虔威為刑獄叅軍累遷為屬王甚美其才與河內張衡俱見禮晉邸稱為二張焉

徐孝克陵之弟也煬帝為皇太子文帝以孝克為國子博士侍東宮講禮傳

宇文述開皇中為右衛大將軍及晉王為皇太子以述為左衛率舊令率官第四品文帝以述素貴遂進率品為第三其見重如此

柳謩之大業初為黃門侍郎時元德太子初薨朝野注

望以齊王當立帝亦重王府選拜為齊王長史帝法服
臨軒命齊王于西朝堂遣吏部尚書牛弘內史令楊約
左衛大將軍宇文述等從殿庭引蹕之詣齊王所西面
立宣勅謂齊王曰我出藩之初時年十二先帝立我于
西朝堂乃令高頻虞慶則元昊等從內送王子相於我
誠我曰以汝未更世事令子相作輔於汝事無大小皆
可委之無得昵近小人疎遠子相若從我言者有益
於社稷成立汝名行如不用此言惟國及身敗無日矣

吾受敕奉以周旋不敢失墜微子相之力吾幾無今日
矣若與謇之從事一如子相也又敕謇之曰今以卿作
輔相齊副朕所望也若齊王德業修備富貴自當鍾卿
一門若有不善罪亦相及

唐李綱初為太子詹事以太子建成漸狎無行之徒有
猜忌之謀不可諫止頻乞骸骨高祖慢罵之曰卿為何
潘仁長史何乃羞為朕尚書且建成在東宮遣卿輔導
何為屢致辭乎綱頓首陳謝曰潘仁賊也誠在殺害每

諫便止所活極多為其長史故得無愧陛下功成業泰
頗自矜伐臣以凡劣才乖元凱所言如水投石安敢久
為尚書兼以愚臣事太子所懷鄙見復不採納既無補
益所以請退帝謝曰知公直士勉弼我兒於是擢拜太
子少保尚書詹事並如故

杜淹武德末隱太子誅後擢為御史大夫判太子詹事
詔東宮儀式簿領並取淹節度至貞觀初為散騎常侍
行太子左庶子兼崇賢館學士太宗謂曰國之儲副自

古所重必擇善人爲之輔佐今太子年在幼冲志意未
定朕若朝夕見之可得隨事誠約今既委以監國不在
目前知卿志懷貞慤能執直道故輟卿於朕以輔太子
宜知委任輕重也

王珪爲禮部尚書魏王泰師太宗嘗謂侍臣曰古來帝
子生于宮闈及其成人無不驕逸是以傾覆相踵少能
自濟我今嚴教子弟欲令皆得安全王珪我久驅使是
所諳悉以其意存忠孝選爲子師爾宜語泰汝之待珪

如事我也可以無過泰每為之先拜珪亦以師道自居
物議善之

孔穎達為給事中以正直稱庶人承乾之在東宮也妙
選朝望為官屬以穎達為太子中允累遷常侍國子祭
酒仍侍講東宮

于志寧為太子左庶子太宗謂志寧曰古者太子既生
卜士負之即置輔弼昔成王幼小周召為師傅日聞正
道習以成性今皇太子既幼小卿當輔之正道無使邪

僻闕其心勉之無怠當稱所委官賞可不次而得也

房玄齡為左僕射拜太子少師玄齡上表遜位優詔不許玄齡固讓乃下詔曰夫選賢之義無私為本奉上之道當仁是貴列代所以弘風通賢所以叶力卿忠肅恭懿明允篤誠草昧霸圖綢繆帝道儀形禮閣庶政惟和輔翼春宮望實斯在而忘彼大體徇茲小節雖恭教諭之職乃辭機衡之務豈所謂弼余一人共安四海者也宜聽此懷無煩固讓玄齡固不奉詔又詔曰玄齡德為

時秀位隆朝右業履恭儉志懷冲退頻表陳誠固辭執法朕旻食思治虛已欽賢方資啟沃共康兆庶豈得申其雅尚用虧曩典便可斷表即令攝職

魏徵為特進知門下省事貞觀中皇太子承乾不修德業魏王泰寵愛日隆內外庶僚並有疑議太宗聞而惡之謂侍臣曰當今朝臣忠謇無踰魏徵我遣傳皇太子用絕天下之望後拜太子太師知門下省事如故徵自陳有疾詔答曰漢之太子四皓為助我之賴公即其義

也知公疾病可卧護之

馬周貞觀中為御史中丞兼知諫議大夫事高宗在藩
盛隆府望周以本官檢校晉王長史及升儲位加中書
侍郎兼太子左庶子

長孫無忌為司徒定策立晉王為太子太宗以無忌為
太子太師房玄齡蕭瑀為傅保制曰明兩之重實固宗
祧輔導之職莫先師保是以呂望召奭騰芳于有周叔
孫玄成繼美於隆漢司徒趙國公無忌器範宏邈風鑒

秀遠材稱棟幹地魚姻戚佐命之功勒乎鍾鼎論道之
譽穆乎台槐股肱是屬邦國攸賴教諭少陽僉望斯在
司空梁國公玄齡體業忠肅識具弘通誠著霸圖功宣
鼎業奉上之節所懷必盡益國之事知無不為必能厲
茲六行審喻三善特進宋國公瑤操行清約識局貞正
夙受先遇早升朝右立身之操必在於直道體國之心
無忘於忠義輔翼儲貳望實攸歸無忌可太子太師玄
齡可太子太傅瑤可太子太保又以黃門侍郎褚遂良

為太子賓客

李勣為兵部尚書高宗踐儲宮以勣為太子詹事兼右衛率同中書門下三品太宗謂勣曰我兒新登儲兩卿舊長史今以宮事相委故有此授雖屈階資可勿怪也來濟為考功員外郎時初置太子司議郎妙選人望遂以濟為之仍崇文館直學士

敬播為著作佐郎以撰實錄功遷太子司議郎時此官初置極為清望

韓瑗高宗顯慶初為侍中時代王弘為皇太子瑗與中書令來濟禮部尚書許敬宗並為皇太子賓客又以尚書左僕射于志寧為太子太傅

劉仁軌上元中為左僕射雍王為皇太子仁軌與右僕射戴至德侍中張文瓘中書令郝處俊並為皇太子賓客

王方慶為麟臺監中宗立為東宮方慶兼檢校太子左庶子則天聖歷二年正授左庶子俸料同職事三品兼

侍皇太子讀書

崔融累補宮門丞兼直崇文館學士中宗在春宮制融為侍讀兼侍屬文

劉禕之為中書侍郎轉相王府司馬高宗謂曰朕之愛
子以卿忠孝之門藉卿師範所冀蓬生麻中不扶自直
耳

元讓高宗末為太子右內率府長史歲滿還鄉里中宗居東宮徵拜司議郎及謁見則天謂曰卿既孝於家必

能忠於國今授此職須知朕意宜以孝道輔我兒也

源乾曜司刑太常伯直心之子開元初邠王守禮府僚
吏有犯法者玄宗令左右求堪為王府長史者太常卿
姜皎薦乾曜公清有吏幹因召見與語乾曜神氣清爽
對答皆有倫序玄宗甚悅之乃拜少府監兼邠王府長
史

潘好禮開元初為邠王府長史六年二月詔曰分命諸
王典於大郡諒存公道以鎮淳風邠王稟性頗寬馭下

不肅且復簡貴未詳倫理故選剛直任之端寮王家奴
客等有違法網者長史潘好禮隨事檢校科決若王有
何怪僻好禮具狀聞徹王歷號隴襄滑晉等州刺史時
皆擇首僚以持網紀好禮與源乾曜袁嘉祚皆為邠府
長史兼州佐

郝常通為國子博士開元六年皇太子及鄴王嗣直等
五人年近十歲尚未就學左散騎常侍褚無量內繕
寫論語孝經各五本以獻玄宗覽之曰吾知無量意矣

乃下詔曰修身貴乎慎始篤學在乎自幼朕諸子已各
髫髻須聞詩禮宜于儒官中選德行者宿三五人入閣
教授俄以常通國子博士郭謙光左拾遺潘元祚等為
太子及郟王已下侍讀

賀知章開元中為散騎常侍時肅宗為陝王天性屬辭
典麗玄宗甚愛之詔知章與潘肅呂向皇甫彬邢璣等
侍讀韓擇木侍書

孔述睿德宗建中初為諫議大夫會有詔東宮官宜擇

端厚之士皇太子時幸太學行齒胄之禮乃以述膚為太子侍讀

徐岱貞元初以前京兆府功曹為膳部員外郎睦王已下侍讀歲中遷水部郎中皇太子侍讀兼舒王已下侍讀

馮伉貞元中為醴泉令韋渠牟薦給事中充皇太子諸王侍讀崔芊自茅山徵為右贊善大夫充太子侍直新名也

歸登貞元末為兵部員外郎皇太子侍讀順宗即位遷
給事中元和四年憲宗冊皇太子與呂元膺俱為皇太
子侍讀詔曰輔翼元良教諭成德使目睹正事耳聞正
言形于施為漸于心術非齊莊忠愍之士不在茲選工
部侍郎歸登給事中呂元膺並踐履端方行義修潔通
於經訓而得其要達於教化而蹈其中侍講承華師範
磐石訪乃公議副予精求並可充皇太子諸王侍讀

李逢吉為給事中元和七年與司勳員外郎李巨並為

太子諸王侍讀

韋綬為屯田郎中元和九年八月以為職方郎中充皇太子及諸王侍讀

薛放為兵部郎中憲宗以儲皇好書求端士輔導經義旋充皇太子侍讀

呂元膺為諫議大夫給事中規諫大舉其職及出為同州刺史乃入謝帝訪以時政元膺抗辭直對無所阿諛帝察其忠蓋命復守舊官加皇太子侍讀賜以金紫

丁公著為右補闕集賢殿直學士元和十一年九月改
為水部員外郎充皇太子侍讀

庾敬休為戶部侍郎文宗太和六年以敬休守本官兼
魯王傅又以太常少卿鄭肅守本官兼魯王府長史以
戶部郎中李踐方守本官兼魯王府司馬魯王帝之元
子帝以年幼思賢傅輔導之時魯王傅和元亮因侍制
召問事元亮出於卒吏不知書一不能對後宰相延英
奏事帝從容曰魯王質性可教宜擇賢士大夫為官屬

不可復用和元亮之輩因有是命

崔栢為中書舍人太和九年二月以栢及考功員外郎
史館修撰蘇滌兼充皇太子侍讀

王起為兵部尚書判戶部事太和九年七月以起及翰
林學士太常少卿知制誥陳夷行並充皇太子侍讀仍
每五日一入長生院對皇太子

劉仲武為國子監四門助教開成元年十二月仲武充
奉諸王講讀

橋庶為河南府緱氏縣開成二年四月以庶為諸王講讀與劉仲武更入教授

韋溫為給事中開成二年五月以溫充皇太子侍讀

竇宗直為秘書少監開成二年七月以宗直為皇太子侍讀

周敬復為禮部員外郎兼起居郎史館修撰開成三年

五月以敬復守本官充皇太子侍讀依前史館修撰

狄兼謩武宗會昌三年二月以兼謩兼益王傅鄭簡之

兼益王府長史制曰古者聖王之教子也皆選天下之
端士以衛翼之漢代梁王好書則以賈誼經緯之才而
耀明之其淮陽好政則以玄成讓兄之節而鎮靜之前王
令猷百代可法况朕建立元子錫之奧區朱邸初開黃
髮是憲以兼暮懷慨立志有素益正席之忠以簡之取
捨俟時有貢禹彈冠之操皆行不苟合誠無暗欺歷職
有聲居正不撓舉其素行擢在顯僚爾宜廣德義之風
明孝愛之道俾其嚴於問寢敬不絕馳化與心成中道

若性欽哉休命可不勉歟

王欽若等按唐書本傳不載此事唐年補錄有此詔而不

載無卷

等本官

王牘為太子賓客昭宗乾寧四年韓建獻封事十條其三太子諸王請置師傅教導乃以牘為諸王侍讀制曰王者之子在襁褓中置三師訓之由古道也我思成人已來邁此多難師訓之義翦焉闕聞南面稱尊愧于寡昧由是言念諸子疚于厥心擇正人為之傳導今丞相言爾牘老於大學雅有德行明君臣父子之道知禮樂

詩書之源可使高步承華大叅望苑琢磨羽翼朕有冀
焉爰授正卿以加峻級且旌優異往為傅師邪蒿鮑魚
勿俾登俎曹筵講肆為惜分陰使其知東平為善之規
喜王褒洞簫之賦承萬代之業固磐石之基斯實賴於
老成人也

後唐劉贊明宗時為刑部侍郎時秦王為元帥秦王府
判官太子詹事王居敏與贊鄉曲之舊以秦王盛年自
恣須朝中選端士納誨冀其稟畏乃奏薦贊焉授秘書

監無秦王傳

冊府元龜卷七百八